

摘藻堂四庫全書薈要

史部

欽定四庫全書薈要卷五千七百六十三

史部

宋史卷一百三十五

元中書右丞相總裁托克托等修

樂志第八十八

樂十

樂章五

朝謁玉清昭應宮

太清宮

朝享景靈宮

封禪

祀汾陰

奉天書

祭九鼎

真宗奉聖祖玉清昭應宮御製十一首

降聖真安 魏巍真宇奕奕殊庭規模太紫炳煥丹青

元命祇答大猷是經多儀有踐不應無形肆設金石
聲聞杳冥佇迴飈馭永祐基扃

奉香靈安 芳氣上浹飈馭下臨紹承丕緒永勵精明
氤氲成霧葱鬱垂陰虔恭對越介祉攸欽

奉饌吉安 發祥有自介福無疆紛綸丕應保佑下方
嘉薦斯備雅奏具揚寅威洞達監眇昭章

玉皇位酌獻慶安 無體之體強名之名監觀萬寓統
治九清真期保祐瑞命昭明乾乾翼翼祇答財成

聖祖位酌獻慶安 於昭靈貺誕啓鴻源功濟庶彙慶

流後昆蘭肴登俎桂酒盈尊俯迴飈駕永庇雲孫

太祖位酌獻慶安 赫赫藝祖受命高穹威加海外化

浹區中發祥宗祐錫祐眇沖欽承積德勵翼精衷

太宗位酌獻慶安 明明文考儲精上蒼禮樂明備溥

率賓王功德累洽歷數會昌孝思罔極丕祐無疆

亞終獻沖安 太初非有體至道本無聲降迹臨下土

成功涉上清至仁敦動植丕緒啟宗祊紫禁承來格

鴻基保永寧發祥垂誕告致孝薦崇名廣樂神欽奉
儲休固太平

飲福慶安 明明始祖誕啓慶基翼翼後嗣虔奉孝思
精潔斯達祉福咸宜于以報貺于以受釐

徹饌吉安 雕俎在御飈駕聞聲真遊斯降旨酒斯盈
大樂云闋大禮云成徹彼常薦罄此明誠

送聖真安 精心既達真遊允臻禮容斯舉福應惟醇
將整仙馭言還上旻永存嘉貺用泰烝民

迎奉聖像四首

並用
慶安

玉皇位 玉虛上帝金像
睟容宅真雲構練日龜從惟
皇對越率禮寅恭靈心不應
福祿來崇

聖祖位 總化在天保昌厥緒
降格皇闈瓊輪載御藻
仗星陳睟容金鑄佑我慶基
宅茲靈宇

太祖位 烝哉大君聿懷帝祖
鎔範真儀奉尊靈宇至
感祥開洪輝物覩瞻謁盡恭
飛英率土

太宗位 於顯神宗德洽區中
祥金爍冶範茲睟容殊

庭胥宇備物致恭明威有赫降福來同

玉清昭應宮上尊號三首

奉告隆安 登隆妙號欽翼淵宗茂宣德禮有恪其容
奉章升薦垂佩彌恭揚休詠美以間笙鏞

太初殿奉冊寶登安 皇靈垂祐洪福彌隆祇率繇寓
潔祀真容嚴恭奉冊對越清躬睟容肅穆懿號尊崇
禮盛樂舉福祿來同

二聖殿奉絳紗袍登安 赫赫列聖威德巍然彤彤靈

宇睟儀在焉奉以龍衮被之象天重慶宗稷億萬斯
年

太尉奉聖號冊寶真安 上旻降監介祉實繁邦家脩
報妙道歸尊增名霄極奉冊靈軒茂宣聖典永祐黎
元

寶冊升殿大安 圖書昭錫典禮紹成烝民何幸教父
儲靈欽承景貺祇奉崇名致虔寶冊垂祐基扃

降神真安 猶龍之聖降生厲鄉教流清淨道符混茫

大君肅謁盛儀允臧森羅羽衛躬薦蕭鄉簪紱濟濟
鍾石洋洋高真至止介福誕祥

奉玉幣靈安 琳宮奕奕黼座煌煌玉帛成禮飈馭延
祥鴻儀有則景福無疆嘉應昭協丕猶誕揚

奉饌吉安 金奏以諧飈遊斯格靈監章明皇心勵翼
肅奉雕俎來升綵席享德有孚凝禧無斁

酌獻大安 欽崇至道肅謁殊庭順風而拜明德惟馨
飈馭來格尊酒斯盈是酌是獻心通杳冥

飲福大安 彼渦之壤指李之區千乘萬騎來朝密都
躬陳芳薦款接仙輿飲酒受福永耀鴻圖

亞終獻正安 邈矣道祖冥幾惚恍常德不離至真無
象引位清穹降祥神壤酌醴薦誠控飈來享

送神真安 醴醖在戶金奏在庭籩豆有踐黍稷非馨
義盡蠲潔誠通杳冥言旋風駟祚我脩齡

太極觀奉冊寶一首

登安之曲 薦號穹冥登名祖禰陟配陽郊協宣典禮

感電靈區誕聖鴻懿冊寶斯陳福祿來暨

景靈宮奉冊寶一首

登安之曲 穆穆真宗錫羨蕃昌飈輪臨貺諄誨洞彰

虔崇懿號祇答景祥至誠致享降福無疆

景祐元年親享景靈宮二首

降真太安 真館奉幣潔齋致馨靈因斯格社稷慶寧

送真太安 椒漿尊享珍饌精祈晬容杳邈瑤輅霞飛

大觀三年朝獻景靈宮二首

奉饌吉安 威靈洋洋靡有常嚮於惟欽承來假來饗
博碩芬香是丞是享奉器有虔載德無爽

爾牲既克是烹是肆爾肴既具是羞是饋非物之重
惟德之備神之格思歆我精意

高宗郊前朝獻景靈宮二十一首

皇帝入門乾安 維皇齊居承神其初顛顛昂昂龍步
雲趨景鐘鏗如肅覲清都盼嚮之交神人用孚

升殿乾安 帝既臨享罄茲精意對越在天爰升紫陛

孔容翼翼保承丕緒孝奉天儀永錫爾類

降聖太安 惟德馨香升聞八方粵神臨之來從帝鄉

萬靈景衛有燧其光監我精純降福穰穰

盥洗乾安 齊居皇皇瓊琚鏘鏘承祭之初其如在旁
挹彼注茲儲禧迎祥神之聽之欣欣樂康

聖祖位乾安 涓選休辰有事嘉薦琅琅瓊珮陟降巖
殿其陟伊何幣玉斯奠周旋中禮千億儲羨

聖祖位奉玉幣靈安 上靈始祖雲景元尊嚴祀夙展

六樂朱軒明玉之潔豐帛之溫暢乃繼序承德不愆
還位乾安 我后臨饗奠幣攸畢式旋其趨架度有式
禮容齋莊孝思純實天休滋至時萬時億

奉饌吉安 百職駿奔來相于庭奉盛以告登茲芳馨
際天蟠地默運三靈神兮來歆祚我休平

再盥洗乾安 有嚴大禮對時休明情文則粲蠲潔必
清再臨觀盥以專以精真游來格永觀厥成

再詣聖祖位乾安 於赫炎宋十葉華耀屬茲郊報陟

降在廟其降伊何椒漿桂酒再拜斟酌永御九有

聖祖位酌獻祖安

御製

瑤源誕啓玉牒肇榮覆育羣有

監觀圓清酒醴既洽登薦惟誠無有後艱駿惠雲仍
還位乾安 奠鬯告成式旋厥位天步雍容神人燕喜
九廟觀德百靈薦祉子孫其昌垂千萬祀

文舞退武舞進正安、於皇樂舞進旅退旅一弛一張
笙磬具舉豈惟玩聲象德是似神鑒孔昭福祿來予
亞終獻沖安 五音飭奏神既億康澹其容與薦此嘉

觴有來顯相銷玉鏘鏘奉承若宥罔不齊莊

飲福報安 嘉薦既終神貺斯復賚我思成靈光下燭

孝孫承之載祇載肅敷錫庶民亟蒙祉福

還位乾安 帝臨闕庭逆釐上靈神鵜安坐肅若有承

嘉觴既申德聞惟馨靈光留俞祚我億齡

徹饌吉安 普淖既薦苾芬孔時神嗜而顧有來燕娛

饗矣將徹載欽載祇展詩以侑益臻厥熙

送真太安 雍歌既徹熙事備成神夕奄虞忽乘青冥

靈心回睠監我精禋誕降嘉祉休德昭清

降殿乾安 我秩元祀上推靈源展事有佺侵威肅然
丹城既降秉心益虔荷天之休于千萬年

望燎乾安 奕奕靈宮有嚴蒞祀燔燎具揚禮儀既備
帝心肅祇天步旋止對越在天永膺蕃祉

還大次乾安 帝將于郊昭事上祀爰茲畢觴復即于
此飈游載旋容旌沓騎維皇嘉承錫祚昌熾

高宗明堂前朝獻景靈宮十首

降聖大安 德惟馨香升聞八方粵神之從燦然有光
驂飛乘蒼啾啾踽踽逍遙從容顧予不忘

升殿乾安 帝既臨享龍馭華耀孝孫承之陟降在廟
誠意上交慶陰下冒天休駢至千億克紹

聖祖位奠玉幣靈安 玉氣如虹豐繒充筭既奉既將
亦莫在位有永羣后實相祀事何以臨下心意不貳
奉饌吉安 瓊琚鏘鏘玄衣繡裳薦嘉升香粢盛芬芳
禮儀莫愆鼓鐘喤喤曾孫之常綏福無疆

聖祖位酌獻祖安 裴回若留靈其有喜薦我馨香挹
茲酒醴我祖在天執道之紀申佑無疆奏神稱禮

文舞退武舞進正安 進旅退旅載執干戚不愆于儀

容服有赫式妥式侑神保是格靈鑒孔昭孝思維則

亞終獻沖安

用舊
辭

飲福報安 於赫大神總司元化監我純精威光來下
延昌之貺千億馮籍曾孫保之丕平是迓

徹饌吉安 洋洋降臨肅肅布列熙事既成嘉籙告徹

九天儲慶垂佑無缺寔明寔昌綿綿瓜瓞

送真太安 高飛安翔持御陰陽幽贊圓穹監觀四方

元精回復奄虞孔良畢觴降嘏偃蹇于驥

望燎乾安 奕奕原祠有嚴誌祀禮儀孔宣燔燎斯暨

帝心肅祇天步旋止熙事既成永膺蕃祉

孝宗明堂前朝獻景靈宮八首

盥洗乾安 合宮之饗報本奉先欽惟道祖濬發璿源

駕言謁款其盥惟虔尚盥精衷錫祚綿綿

聖祖乾安 駿命有開慶基無窮祇率百辟仰瞻眸容

鼓鐘斯和黍稷斯豐靈其居歆福祿來崇

還位乾安 嘉玉既設量幣既陳髣髴靈游來顧來寧

對越伊何厥惟一純佑我熙事以迄于成

奉饌吉安 發祥仙源流澤萬世曷其報之親饗三歲

相維列卿潔粢是饋匪物之尚誠之為至

再詣盥洗乾安 華燈熒煌瑞烟氤氳威神如在蠲潔

必親再盥于壘再悅于巾皇心肅祇其敢憚勤

再詣聖祖位乾安 歲逢有年月旅無射我將我饗如
幾如式肅爾臣工諧爾金石本原休功垂裕罔極
還位乾安 旨酒思柔神具醉止工祝既告孝孫旋位
何以酢之純嘏來備燕及雲來蕃衍無已

文舞退武舞進正安 象德之成有奕其舞一弛一張
進旅退旅嘒以管簫和以鑪鼓神其樂康永錫多祜
寧宗郊前朝獻景靈宮二十四首

皇帝入門乾安 闕幄邃深雲景杳冥天清日晬展容

玉庭締基發祥希夷降靈神其來燕是饗是聽

升殿乾安 帝居瑤圖璇題玉京日月經振列宿上熒
桂簋飭芬瑚器華精貢承禋祀用戒昭明

降神太安六變園鐘為宮 四靈晨耀五緯夕明風雲

晏和天地粹清靈兮來迎啓我子孫饗于純精

黃鐘為角 芬枝揚烈煥珠叶陶闔珍闡符展詩舞節
神哉來下神哉來翔肅若有承靈心招搖

太簇為徵 龍車既奏鳳馭載翔帝幄佇靈天衢騰芳

神來留俞神來蹇驥禮鬯樂明奏假孔將

姑洗為羽 虹旌蜺旌鸞旗翠蓋星樞扶輪月御叶衛

靈至陰陰靈般喬喬來格來饗福流萬世

盥洗乾安 禮文有倣祀事孔明將以潔告允惟齊精

自盥而往聿觀厥成靈監下臨天德其清

詣聖祖位乾安 維宋肖德欽天顧右於皇道祖丕釐

靈祐葛藟殖繁瓜瓞孕茂克昌厥後世世孝奏

聖祖位奉玉幣靈安

高宗御
製見前

皇帝還位乾安 桂宮耽耽藻儀穆穆天回袞彩風韶

璜玉咸英皦亮容典炳煜假我上靈景命有僕

奉饌吉安 我簋斯盈我簠斯實或剝或烹或燔或炙

有穀既將為俎孔碩禮儀卒度永錫爾極

再盥洗乾安 觴澹初勺禮戒重盥假廟以萃取象于
觀清明外暢精肅中貫我儀圖之三靈攸贊

再詣聖祖位乾安 肇基駿命鞏右鴻業鼎玉龜符垂

固萬葉靈貺具臻神光燦燦暉祚無疆規重矩疊

聖祖位酌獻祖安

高宗御製見前

還位乾安

皇帝瑞慶長發其祥纂系悠遠朔源靈長

德之克明休烈有光配天作極孝饗是將

文舞退武舞進正安

持翟成象秉朱就列旄乘整溢

鳳儀諧節揮舒皇文歌蹈先烈合好効懽福流有截

亞獻沖安

光煥紫幄神流玉房秉文侑儀嘉虞貳觴

震澹醉喜彷彿迪嘗璇源之休地久天長

終獻沖安

靈輿蹇驤畢觴泰筵貳饗允穆裸將克竣

垂恩儲祉錫羨永年將以慶成燕及皇天

詣飲福位乾安 若木露英清雲流霞蔓蔓芝秀馮馮

桂華綿瑞無疆產嘏孔奢皇則受之鞏我帝家

飲福酒報安 旨酒惟蘭勺漿惟椒福流瓚學光燭琨

瑤拜祝清宮凝輝慶霄神其如在徘徊招搖

還位乾安 烝哉我皇繼天毓聖逆釐元都對越靈慶

如天斯久如日斯盛瑤圖濬邈永隆駿命

徹饌吉安 房劔陳列室簋登奉告饗具歆展徹惟拱

祥光奕奕嘉氣懔懔受嘏不訐燕天之寵

送真太安 雲車風馬靈其來游天門軼蕩神其莫留
遺慶陰陰祉發祥流康我有宋與天匹休

降殿乾安 璇庭爛景紫殿流光禮洽乾回福應日昌
聖系龐鴻景命溥將德茂功成率祀無疆

詣望燎位乾安 厥初生民淵濬唯祖芳薦既輟明燎
具舉德馨升聞靈貺蕃詡懷濡上靈佑周之祐

還大次乾安 帝假于宮彝承清祀天暉臨幄宸衛森

峙行繇大室旋趨紫時率禮不違式專靈祉

理宗明堂前朝獻景靈宮二首

餘用
舊辭

升殿登歌乾安 我享我將罄茲精意陟降左右維天

與契齋明乃心祇肅在位於萬斯年百福來備

亞獻宮架沖安 慶雲郁郁鳴璆琅琅澹其容與申薦

貳觴奉承若宥神其樂康錫以多祉源深流長

大中祥符封禪十首

餘同南
北郊

山上園臺降神高安 巖巖泰山配德于天奉符展采

翼翼乾乾滌濯靜嘉罔有弗蠲上帝顧諟冷風肅然
昊天上帝坐酌獻奉安 皇天上帝陰隲下民道崇廣
覆化洽鴻鈞靈文誕錫寶命維新增高欽事式奉嚴
禋

太祖配坐酌獻封安 於穆聖祖肇開鴻業我武惟揚
皇威有曄四隩混同百靈震疊陟配高穹明靈是接
太宗配坐酌獻封安 祇若封祀神宗配天禮樂明備
奠獻精虔景靈來格休祥藹然於昭垂慶億萬斯年

亞獻恭安 因高定位禮脩物備薦鬯卜牲虔恭寅畏

八音克諧天神咸暨降福穰穰永錫爾類

終獻順安 浩浩元精無臭無聲臨下有赫得一以清
備物致享薦茲至誠泰尊奠獻夙夜齊明

社首壇降神靖安 至哉坤元資生伊始博厚稱德沈

潛柔止降禪方位聿脩明祀寅恭吉蠲永錫蕃祉

皇地祇坐酌獻禪安 坤德直方博厚無疆秉陰得一

靜而有常寶藏以發乃育百昌肅祇禪祭錫祉穰穰

太祖配坐酌獻禪安 皇矣聖祖丕赫神武秉運宅中

威加九土德厚功崇頌聲載路陟配方祇對天之祐

太宗配坐酌獻禪安 愍祀柔祇報功厚載思文太宗

侑神嚴配鍾石斯和籩豆咸在永錫坤珍資生為大

汾陰十首

降神靖安 茫茫坤載粵惟太寧資生光大品物流形

瞻言汾曲允宅神靈聖皇躬享明德惟馨

奠玉幣登歌嘉安 至誠旁達柔祇格思奉以琮幣致

誠在茲

奉俎豐安 博碩者牲載純其色體薦登俎聿崇坤德

后土地祗坐酌獻博安 秉陰成德敏樹宣功應變審

諦神力無窮沈潛剛克流謙示中潔茲奠獻妙物玄

通

太祖配坐酌獻博安 坤元茂育植物成形於穆聖祖

功齊三靈嚴恭配侑厚德攸寧永懷錫羨歆此惟馨

太宗配坐酌獻博安 報功厚載祀事惟明思文烈考

道濟羣生侑神定位協德安平馨潔並薦享于克誠
飲福博安 寅威寶命明祀惟慶協神備物罔不吉蠲
后祗格思靈飗肅然誕受景福遐哉億年

亞終獻正安 至哉柔祗滋生蕃錫滌濯靜嘉寅恭夕
惕金奏純如萬舞有奕立我烝民莫匪爾極

后土廟降神靖安 博厚流形秉陰成德柔順利正直
方維則明祗格思素汾之側祗載吉蠲宸心翼翼

酌獻博安 至哉物祖設象龍雕動靜之德翕闢攸宜

嘉粟以薦精禱洪釐茂宣陰貺五穀蕃滋

祇奉天書六首

朝元殿酌獻瑞文 妙道非常神變無方惟天輔德靈

貺誕章玄文昭錫寶歷彌昌禮崇明祀式薦馨香

含香園瑞文 運格熙盛將封介丘禮神之域瑞命殊
尤靈文薦降丕顯皇猷聖心肅奉永洽鴻休

泰山社首壇升降瑞文 玄穹眷懷寶符申錫垂露騰

文粲然靈迹發祥吉圖純熙寫奕登薦欽崇式昭天

歷

奉香酌獻瑞安

謂天蓋高惟皇合德倬彼靈章圖書

是錫眷命諄諄被以遐歷膺錄告成虔恭欽翼

地屆興王祥開圖錄典禮昭成祺祥交屬大輅逶迤

卿雲紛郁祐我含靈錫茲介福

祥符七年奉祀畢天書迴至應天府有雲

物之瑞命製是曲以紀休應

升降靈文

旻穹無聲惟德是輔降監錫符垂文篆素

孝瑞紀封英聲載路既壽而昌篤天之祐

祭九鼎十二首

帝鼐

土王
日祀

降神景安

日號丙丁方號中央德惟其時

蠲吉是將夫何飲之黃流玉瓚夫何食之有陳伊饌

奉饌豐安 粢盛既豐牲牢既充展茲熙事溫溫其恭

惟明欣欣燔炙芬芬保乎天子繁祉薦臻

亞終獻文安 工祝致辭黃流協鬯爰登清歌載期神

享噫予誠心精禋是虔嘉予陳祀豐盈豆籩

春分蒼鼎亞終獻成安 法乾剛兮鑄鼎奠方涓嘉旦

兮齊明迎祥胡為持幣維箱及筥胡為和羹有錡維
釜

立夏岡鼎迎神凝安 我方東南我日朱明爰因其時
鼎以岡名案盛既馨牲牲既盈佑我皇家異令風行
亞終獻成安 黃流在中惟馨香祀於薦于神爰祇厥
事禮從多儀以進為文尊竿三獻昭示孔勤

夏至彤鼎酌獻成安 犧尊將將俎基自堂牲牲肥腍
鼓鐘煌煌肆予醴齊椒馨飴香聿來歌顧天祚永昌

立秋阜鼎酌獻成安 明德崇享磬管鏘鏘鏗兮佩舉

綈冠齊莊肆陳有序承箱是將其牲伊何籩豆大房

秋分晶鼎亞終獻成安 神宮巍巍庭燎有輝聲諧備

樂物陳豐儀清酌既載酌言獻之惟神醉止聿來蕃

釐

立冬魁鼎迎神凝安 時運而冬乃神玄冥陰陽相推

豐年以成越陳嘉肅牲牢粢盛來享來依監于明誠

酌獻成安 壘之初登其儀昭陳壘之既裸其香升聞

神心嘉止於焉欣欣貽我有年穰穰其仁

冬至寶鼎奠幣明安 秉心齊明奉牲博碩匏絲鏗陳

冠佩儼飾其肆其將明神來格執奠維何猗歟幣帛

宋史卷一百三十五

宋史卷一百三十五考證

樂志十標目太清宮○臣酉按後有太極觀並無太清

宮也此處恐誤

真宗奉聖祖玉清昭應宮御製十一首○昭應宮下通
考有景靈宮三字

宋史卷一百三十五考證

謹案卷一百三十四第十頁後四行太宗室酌獻
大定刊本宗訛祖據前後文改

第十三頁前一行明信咸通刊本信咸訛咸信據
監本改

第二十二頁前七行飏旉寧燕刊本寧燕訛燕寧
據南監本改

卷一百三十五第十一頁前一行月旅無射刊本
射訛附據監本改

總校官庶吉士
校對官編修
臚錄舉人

總校官庶吉士 臣張能照

校對官編修 臣閔懋大

臚錄舉人 臣嚴儀

欽定四庫全書叢要

史部

宋史卷一百三十六



詳校官編修臣王天祿

欽定四庫全書蒼要卷五千七百六十四

史部

宋史卷一百三十六

元中書右丞相總裁托克托等修

樂志第八十九

樂十一 樂章六

祀嶽鎮海瀆

祀大火

祀大辰

大中祥符五嶽加帝號祭告八首

迎神靜安 鐘石既作俎豆在前雲旗飛揚神光肅然

當駕颺歛來乎青圓言備縟禮享茲吉蠲

冊入門正安 節彼喬嶽神明之府秩秩威儀肅肅靈

宇懿號克崇庶物咸覩帝籍升名式綏九土

酌獻東嶽嘉安 節彼岱宗有嚴廟貌惟辟奉天依神
設教帝典焜煌嘉薦普淖至靈格思殊祥是效

南嶽 作鎮炎夏畜茲靈光敷與萬物既阜既昌爰刻
溫玉式薦徽章昭嘏神意福熙穰穰

西嶽 瞻言太華奠方作鎮典冊是膺等威以峻上公

奉儀祀宮薦信介祉萬邦永配坤順

北嶽 仰止靈嶽鎮于朔方增崇懿號度越彝章祇薦
嘉樂式陳令芳永資純佑國祚蕃昌

中嶽 巖巖神嶽作鎮中央肅奉徽冊尊名孔章聿降
飈駕載獻蘭觴熙事允洽寶祚彌昌

送神靜安 祇薦鴻名寅威明祀有楚之儀如在之祭
奠獻既終禮容克備神鑒孔昭福禧來暨

天安殿冊封五嶽帝一首

册出入正安 名嶽奠方帝儀克舉吉日惟良九賓咸
旅温玉鏤文纁裳正宁禮備樂成篤神之祐

熙寧望祭嶽鎮海瀆十七首

東望迎神凝安 盛德惟木勾芒御神沂岱淮海厥功
在民爰熙壇坎袞對庶神予以歆格靈貽具臻

升降同安 紳鞞禕兮玉佩樂兮于我將事神燕喜兮
帝命望祀敢有不共往返于位肅肅雍雍

奠玉幣明安 祀以崇德幣則有儀肅我將事登降孔

時精明純潔固有弗祇史辭無愧神用來娛

酌獻成安 肇茲東土含潤無疆維時發春嘉薦令芳
祭用蕤沈順性含藏不涸不童誕降祺祥

送神凝安 神之至止熙壇為春神之將歸旂服振振
歛兮迴飈宵兮旋雲祐于東方永施厥仁

南望迎神凝安 嵩嵒衡霍暨厥海江時惟長養惠我
南邦肆嚴牲幣神式來降以侑以妥百福是龐

酌獻成安 景風應律朱鳥開辰肅肅明祀嘉籩列陳

牲用牲物樂奏蕤賓克綏永福祐此下民

送神凝安 鼓鐘云云歛管伊伊神既醉飽曰送言歸

山有厚藏水有靈德物其永依往奠炎宅

中望迎神凝安 維土作德維帝御行含養載育萬物

以成有嚴祀典薦我德馨神其歆止永用億寧

酌獻成安 高廣融結實維中央宣氣報功利彼一方

坎壇以祀六樂鏘鏘靈其有喜酌以大璋

送神凝安 言旋其處以奠中域無替厥靈四方是則

神永不息祀永不愆以享以報于萬斯年

西望迎神凝安 品物順說時司金行于郊迎氣以望

庶靈雅歌惟樂主薦惟牲作民之祉永相厥成

酌獻成安 西顛沆碭執矩司秋訛言協靈時祀孔脩

禮有薦獻爰祀公侯秩而祭之百福是道

送神凝安 我樂我神簋俎腥膻曰神之還西土是宮

于蕃禽魚于衍草木富我藪隰滋我高陸

北望迎神凝安 帝德乘坎時御閉藏爰潔牲醴兆茲

北方海山攸宅神施無疆具享蠲吉降福孔穰

酌獻成安 淒寒凝陰隕籜滌場百物順成黍稷馨香

款于北郊爰因其方何以侑神薦此嘉觴

送神凝安 維山及川奠宅幽方我度其靈降止靡常

肅肅坎壇既迎既將促樂徹俎是送是望

紹興祀嶽鎮海瀆四十三首

東方迎神凝安 帝奠九壺孰匪我疆繫我東土山川

相望祀事孔時肅雍不忘業我濛鴻郁哉洋洋

初獻盥洗同安 青陽肇開祀事孔飭鬱人贊溉其馨
苾苾敬爾威儀亦孔之則神之格思無我有斲

奠玉幣明安 司歷告時惟孟之春爰舉時祀旅于有
神鼓鐘既設珪帛具陳阜蕃庶物以福我民

東嶽位酌獻成安 巖巖天齊自古在昔膚寸之雲四
方其澤惟時東作祀事迺飭惠我無疆恩霑動植

東鎮位 惟山有鎮雄於其方東孰為雄于沂之疆祀
事有時爰舉舊章我望匪遙庶幾燕饗

東海位 瀕洞鴻濛天與無極導納江漢節宣南北順
助其功善下惟德我祀孔時以介景福

東瀆位 我祀伊何于彼長淮導源桐柏委注蓬萊扞
齊護楚宣威示懷豆邊列陳亦孔之偕

亞終獻酌獻

四位
並同

我祀孔肅神其安留容與裴回若

止若浮洽此重觴申以百羞無我數遺萬邦之休

送神凝安 蹇兮紛紛神實戾止以飲以食以享以祀
呦兮冥冥神亦歸止以醉以飽以錫爾祉

南方迎神凝安 朱明盛長我祀用飭厥祀伊何山川
咸秩如將見之繩繩齊栗神哉沛兮逍遙來格

初獻盥洗升降同安 爰熙嘉壇揭虔絜祀鬱人沃盥
贊我裸事于降于登以作以止莫不肅雍告靈饗矣
奠玉幣明安 我祀我享儀物孔周一純斯舉二精聿
脩璞兮其溫絲兮其紕是薦潔蠲神兮安留

南嶽位酌獻成安 神曰司天居南之衡位焉則帝于
以奠方南訛秩事望禮有常庶幾嘉虞介福無疆

南鎮位 維南有山于彼會稽作鎮在昔神則司之厥
有舊典以祀以時百味維旨靈其燕娛

南海位 維水善下利物曰功逶迤百川誰歟朝宗蕩
蕩大受於焉會同管蕭列陳以答鴻濛

南瀆位 四瀆之利經營中國南曰大江險兮天設維
爾有神隄其廟食望秩孔時我心翼翼

亞終獻酌獻 神之游兮洋洋對越澹乎容與盼饗斯
答乃奏既備八音攸節重觴申陳百禮以洽

送神

曲同
迎神

薦徹豆籩熙事備成靈兮將歸羽旄紛紜

飄其逝矣浮空繭雲悵然顧瞻有撫懷心

中央迎神凝安 天作高山屹然中峙經營厥宇萬億

咸遂火熙土王爰舉時祀繩繩宣延彷彿來止

初獻盥洗升降同安 思來感格肅雍不忘禮儀既備

濟濟踳踳潔蠲致敬往薦其芳交若有承神兮孔饗

奠玉幣明安 練日有望高靈來下何以告誠心惟物

假有筐斯實有寶斯籍于以奠之神光燭夜

中嶽位酌獻成安 與天齊極伊嵩之高顯靈効異神

休孔昭飭我祀事實俎鸞膾以侑甘旨其馨有椒

中鎮位 禹畫九州河內曰冀霍山崇崇作鎮積勢我
祀如何百末旨味承神燕娛諸神畢至

亞終獻酌獻 禮樂既成肅容有常奄留逍遙申畢重
觴仰臚所求降福滂洋師象山則以況皇章

送神 曲同
迎神 虞至旦兮靈亦有喜蹇欲驤兮象輿已轆

粥音送兮靈聿歸矣長無極兮錫我以祉

西方迎神凝安 有岌斯安有涵斯洽聿相厥成允祀
是答爰飭迺奏迺奏既協於昭降止是遵是接

初獻盥洗升降同安 靡實不新靡陳不濯人之弗蠲
矧敢將酌載晞之悅載濡之勺洗儀告備陟降時若
奠玉幣明安 彼林有廐彼澤有沈猗與西望弗菲弗
淫迺追斯邸迺愴斯尋邛禮既卒是用是歆

西嶽位酌獻成安 屹削厥方風雲斯所陰邑有宮位
恤侯侯清酌在尊靈眷在下于俎獻兮則莫我吐

西鎮位 維吳崇崇于汧之西瞻彼有隴赫赫不迷克
禋于嶽我酌俶齊於凡有旅眊公維躋

西海位 奄浸坤軸滋殖其濊而典斯稽有陞有墮弗
替時舉元筭斯酌胡先于河實委之會

西瀆位 自彼崑虛于以潛流念茲誕潤豈侯不猶在
昔中府暨海聿脩迄既望止神保先旨

亞終獻 肅肅其乂既旨既溢迨其畢酌偏茲博碩祀
事既遂不敢諄射神或醉止我心斯懌

送神

曲同
迎神

迺羞既徹迺奏及闕無餽斯俎式聽致謁
不蹇不蹶不沸不決厲魃其祛永庇有截

北方迎神凝安 我土綿綿孰匪疆理惟時幽都匪曰
隄只滌哉良月朔風其同曷阻曷深其亦來降

初獻盥洗升降同安 壽宮輝煌聿修時祀續其臨矣
吉蠲以竢居乎昂昂行乎遂遂敬爾攸司展采錯事
奠玉幣明安 相予陰威厥功浩浩一歲之功何以為
報府有珪幣我其敢私肅肅孔懷予以將之

北嶽位酌獻成安 瞻彼芒芒曰北之常既高既厚迺

紀迺綱薦鬯伊始靈示孔將玄服鐵駕覽此下方

北鎮位 赫赫作鎮幽朔之垂兼福我民食哉具宜克
配彼岳有嚴等衰蠲我灌禮其敢不祇

北海位 八裔皆水此一會同云云天墟洞蕩洪濛至
哉維坎不有斯功所秩伊何黃流在中

北瀆位 水星之精播液發靈不脅于河既介以清翼
翼盥薦椒糝芬馨載止載留爰弭翠旌

亞終獻 俎豆紛披金石繁會侑以貳尊匪瀆匪怠我
儀既周我心孔戒愴兮容與彷彿如在

送神

曲同
迎神

靈既醉飽禮斯徹兮靈亦樂康樂斯闋兮
雲征飈舉不可尼兮薦福錫祉曷有極兮

淳祐祭海神十六首

迎神始安宮一曲 堪輿之間最鉅惟瀛包乾括坤吐

日滔星祀典載新禮樂孔明鑒吾嘉賴來燕來寧

角一曲 四溟廣矣八紘是紀我宅東南迴復萬里洪

濤颶風安危所倚祀事特隆神其戾止

徵一曲 若稽有唐克致崇極祝號既升爰增祭式從

享于郊神斯受職我祀肇新式祈陰隲

羽一曲 猗與祀禮四海會同靈之來沛鞭霆馭風盼

嚮彷彿在位肅雍佑我蒸民式徵神功

升降欽安 靈之來至垂慶陰陰靈之已坐飭茲五音

壇殿聿嚴陟降孔欽靈宜安留鑒我德心

東海位奠玉幣德安 百川所歸天地之左瀕洞鴻濛

功高善下行都攸依百祿是荷制幣嘉玉以侑以妥

南海位奠玉幣瀛安 祝融之位貴乎三神吞納江漢

廣大無垠長為委輸祐我黎民敬陳明享允鑒恭勤

西海位奠玉幣潤安 蒲菖之澤派引天潢羲娥出入

浩渺微茫蓋高斯覆猶隔封疆我思六合肇正吉昌

北海位奠玉幣瀚安 翰海重潤地紀亦歸吞受百瀆

限制北陲一視同仁我心則怡嘉薦玉幣神其格思

捧俎豐安 昭格靈貺祀典肇升牲牲告充雕俎是承

薦虔効物省德惟馨靈其有喜萬宇肅澄

東海位奠酌獻熙安 滄溟之德東南具依熬波出素

國計攸資石臼却敵濟我王師神其享錫益昇燕綏
南海位酌獻貴安 南溟浮天旁通百蠻風檣迅疾琛
舶來還民商永賴坐消寇姦薦茲嘉觴弭矣驚瀾

西海位酌獻類安 積流疏派被于流沙布潤施澤功
均邇遐我秩祀典四海一家祇薦令芳靈其享嘉

北海位酌獻溥安 儵忽會同裴回安留牲肥酒香晨

事聿脩惟德之涼曷奄九州帝命是祇多福自求
亞終獻饗安 邊豆有楚貳觴斯旅神其醉飽式燕以
序百靈祕怪蜿蜓飛舞錫我祺祥有永終古

送神成安 告靈饗矣錫我嘉祚乾端坤倪開豁呈露
玄雲聿收羣龍咸驚滅除凶災六幕清豫

紹興祀大火十二首

降神高安園鍾為宮 五緯相天各率其職司禮與視
則維熒惑至陽之精屆我長嬴予以求之祀事孔明

黃鍾為角 有出有藏伏見靡常相我國家鑒觀四方
視罔不正終然允臧其神來格明德馨香

太簇為徵 小大率禮不愆于儀展采錯事秩祀孔時
維今之故閱我數度修厥典常神其來顧

姑洗為羽 於赫我宋以火德王永永丕圖繫神之相
神之來矣維其時矣禮備樂奏神其知矣

升殿正安 有儼其容有潔其衷屹屹崇壇伊神與通
神肯降格嘉神之休虔恭降登神乎安留

熒惑位奠玉幣嘉安 馨香接神盼嚮恍惚求神以誠

薦誠以物有藉斯玉有籩斯幣是用薦陳昭茲精意

商丘宣明王位奠幣嘉安 熒惑在天惟火與合繫神

主火純一不雜作配熒惑祀功則然不腆之幣予以

告虔

捧俎豐安 火遵其令無物不長視此牲牢務得其養

豢以祀神有膾其肥非神之宜其將曷歸

熒惑位酌獻祐安 皇念有神介我戩穀登時休明有

此美祿酌言獻之有飶其香神兮燕娛醉此嘉觴

宣明王位酌獻祐安 誰其祀神知神嗜好闕伯祀火

為神所勞晷言配食既與火俱於樂旨酒承神嘉虞
亞終獻文安 神既貺施嗜我飲食申以累獻以承靈
億神方常羊咸畢我觴于再于三于誠之將

送神用理安 登降上下奠璧獻筭音送粥粥禮無違
者已虞至旦神其將歸顧我國家遺以繁釐

出火祀火辰十二首

降神高安園鍾為宮 熒熒我宋火德所畀用火紀時
允惟象類神目類歌誠絲類至有感斯通孚我陽燧
黃鍾為角 樂音上達粵惟出虛火性炎上亦生於無
我鏞我磬我笙我竽氣同聲應昭哉合符

太簇為徵 火在六氣獨處其兩感生維君繫辰克相
何以驗之占茲垂象騰駕蒼蚪歛其來饗

姑洗為羽 星入於戌與火俱誦火出於辰與星俱伸
一伸一誦孰操縱之利用出入民咸用之

升殿正安 屹彼嘉壇赤伏始屆揆光耀明洋乎如在
俛仰重離默與精會隨我降升肅聽環珮

大辰位奠玉幣嘉安 維莫之春五陽發舒日之夕矣

三星在隅莫量匪幣莫嘉匪玉明薦孔時神光下矚

商丘宣明王奠幣嘉安 二七儲神與天地並孰儷厥

德聿惟南正功懋陶唐澤流億姓作配嚴禋贊列惟

稱

捧俎豐安 有嚴在滌陳彼牲牢孔碩其俎薦此血毛

厥初生民飲茹則然以燔以炙伊誰云先

大辰位酌獻祐安 孰為大辰維北有斗曾是彗星斯

名孔有幽榮報功潔齊敢後容與嘉觴式歆旨酒

宣明王位酌獻祐安 周設司燿雖列夏官仍襲孔易

闔端實難相彼商丘永懷初造不腆桂椒匪以為報

亞終獻文安 潛之伏矣柞栴既休有椒其來榆柳是

求靈駕紛羽尚其安留飲我三爵言言油油

送神理安 五運惟火實宗衆陽宿壯用明千載愈光

神保聿歸安處火房鬱攸不作炎圖永昌

納火祀大辰十二首

降神高安圜鍾為宮 赫赫皇圖炎炎火德侈神之賜

奄有方國粢盛既豐俎豆有飶於萬斯年報祀無斁
黃鍾為角 火星之躔有燧其光表于辰位伏于戌方
時和歲稔仁顯用藏告爾萬民出納有常

太簇為徵 季秋之月律中無射農事備收火功告畢
克禋克祀有嚴有翼風馬雲車尚其來格

姑洗為羽 明明我后重祭欽祠有司肅事式薦晨儀
禮惟其稱物惟其時神之聽之福祿來為

升殿正安 猗與明壇右平左城冕服斯皇玉佩有節
陟降惟寅匪徐匪疾式崇大祀禮文咸秩

大辰位奠玉幣嘉安 金行序晚玉露晨清齋戒豐潔
肅恭神明嘉幣惟量嘉玉惟精于以奠之庶幾來聽
商丘宣明王位奠幣嘉安 恭惟火正自陶唐氏邑于
商丘配食辰祀有功在民有德在位敢替典常惟恭

奉幣

捧俎豐安 萬彙攸成四方寧謐工祝致告普存民力
迺薦斯牲為俎孔碩介以繁祉式和民則

大辰位酌獻祐安 庶功備矣休德昭明天地釀和鬱
鬯斯清玉瓚以酌瑤觴載盈周流常羊來燕來寧

宣明正位酌獻祐安 廣大建祀式崇其配馨香在茲
清酒既載穆穆有暉洋洋如在聿懷嘉慶繫神之賚

亞終獻文安 幣玉肅陳笙簧具舉桂醑浮觴瓊羞溢

俎禮有三獻式和且序神具醉止慶流寰宇

送神理安 神靈降鑒天地回旋惟馨薦矣既醉歆焉
諸宰斯徹式禮莫愆隕祉降祥天子萬年

宋史卷一百三十六

宋史卷一百三十六考証

樂志十一熙寧望祭嶽鎮海瀆十七首○

臣西

按東南

中西北俱有迎神酌獻送神之樂獨升降奠玉幣之樂惟東望有之者蓋迎送酌獻諸樂五望各切其方惟升降奠玉幣二樂其詞可通用故也

宋史卷一百三十六考證

欽定四庫全書薈要卷五千七百六十五

史部

宋史卷一百三十七

元中書右丞相總裁托克托等修

樂志第九十

樂十二 樂章六

祭太社太稷

祭風雨雷師

祭先農先蠶

親耕藉田蜡祭

釋奠文宣王

武成王

祭祚德廟

祭司中司命

景德祭社稷三首

降神靜安 百穀蕃滋麗乎下土聿崇明祀垂之千古
育物惟茂粒民斯普報本攸宜國章咸覩

奠玉幣酌獻嘉安 於穆大祀功利相宣靈壇美報歷
代昭然介以蕃祉祚以豐年土爰稼穡允協民天

送神靜安 制幣犧齊正辭無愧樂以送之畢其精意
景祐祀社稷三首

迎神靈安 五紀之本百貨何極道著開闢惠周動植
國崇美穀民資力穡奠獻惟寅神靈來格

初獻升降正安 太社后土太稷后稷奠玉幣並嘉安

奉俎豐安

同前

亞終獻文安送神寧安 神之來兮降茲下土神之去

兮杳無處所壇壝肅然瘞幣徹俎乃粒之功冠于萬

古

奉俎豐安

神州地祇皇地祇與社稷通用

禮崇明禋惟馨斯酒潔粢

豐盛殺時犇牡齊莊嚴祇升燎于禋其報伊何如山

如阜

大觀祀社稷九首

迎神寧安黃鍾二奏 惟土之尊民食資焉陰祀昭格

牲牢腥羶有功于民告其吉蠲神之來享雲車翩翩
太簇角二奏 惟穀之神函育無窮百嘉蕃殖民依厥
功嚴飭壇壝威儀肅雍神之來享祈于登豐

姑洗徵二奏 猗歟那歟生養斯民家給人足時底熙
純祗嚴明禋於薦苾芬粢盛豐潔神乃有聞

南呂羽二奏 籩豆斯陳三牲告幽報本之禮答神之

休來歆芬香豐登于秋倉箱千萬治符成周

初獻升降正安 崇崇廣壇嚴恭祀事威儀孔時周旋
進止鏘若環珮誠通于幽相于農植邦其咸休

奠幣嘉安 於嘻陰祀封土惟崇于時之吉歆予鼓鍾
柔靜化先人賴其功陳茲量幣百貨是隆

酌獻嘉安 坤元生物功利相宣蠲茲祀事美報致虔
清酏芬如靈壇歸然酌尊奠觴神其格焉

亞終獻文安 薦嘉賈時洋洋來格載登茲壇齊明維

敕神用居歆順成農穡其崇若墉其比如櫛

送神寧安 尊壘芬香威儀肅雍靈心嘉止洋洋交通

神歸降禧年斯屢豐倉箱千萬慰予三農

紹興祀太社太稷十七首

迎神用寧安函鍾為官

春社用

五祀之本社稷有嚴芟

作伊始夫敢不虔吉日惟戊式薦豆籩神其來格用

介有年

函鍾為宮

秋社臘用

功烈在民誕受露雨良耜既歌乃揚

帟舞是奉是尊厚禮斯舉相其豐年多稔多黍

太簇為角 是尊是奉茲率舊章樂音純繹薦溢圓方
情文備矣神其迪嘗永觀錫羨多穡穰穰

姑洗為徵 穀資土養民賴穀生功利之博莫之與京
式嚴祀壇因物薦誠禮具樂奏惟神顧歆

南呂為羽 國主社稷時祀有常肅若舊典報本不忘
粢盛豐潔歌吟青黃尊神倏來百物賓將

盥洗正安 祭重齊肅神格專精沃洗于阼涓潔著誠

清明鬯矣熙事備成以似以續如坻如京

升壇正安 神地之道粒食有先歲謹祈報禮嚴豆籩

降登裸薦罔或不虔以似以續宜屢豐年

大社位奠玉幣嘉安

春秋大社土
正后稷通用

土發而祭農祥是

祈籩豆加篚典禮有彛惟茲珪幣用告肅祇神靈降

鑒錫我繁釐

大社位奠玉幣嘉安

秋臘大社土
正后稷通用

赫赫媪神稼穡是

司方是藉欽報本攸宜嘉壇建祀玉帛陳儀明靈昭

格以介蕃釐

還位正安 國主大社地道聿神稷司百穀利毓惟均
練日新吉粢盛苾芬神燕娛矣福此下民

捧俎豐安 嘉承天和黍稷翼翼默相農功絜神之德
俎實犧牲舊章是式嗣有豐年我庾維億

大社位酌獻嘉安

春社大稷土
正后稷通用

封土崇祀有烈在民

千載不昧福此人羣洗爵奠尊有酒其芬神具醉止
禮樂欣欣

大社位酌獻嘉安

秋稷臘大社土
正后稷通用

叶氣嘉生年穀順

成萬億及秭如坻如京奉時犇牡告於神明歌此良
耜於昭德馨

亞終獻文安 風雨時若自天降康稼穡滋殖自神發
祥穀我婦子豐年穰穰報本嚴祀齊明允臧

徹豆娛安 報本之禮載于甲令靈壇昭告神既來聽
徹彼豆籩精誠斯罄實惟豐年農夫之慶

送神寧安 乃粒烝民功昭萬古國有常祀薦獻式叙

肅肅雍雍舊章咸舉神保聿歸介我稷黍

望瘞正安 地載萬物民資迺功報本稱祀太稷攸同
禮樂既備訖埋愈恭神其降嘏時和歲豐

熙寧祭風師五首

迎神欣安 飄颻而來淅瀝而下爰張其旂爰整其駕
有豆有登有兆有壇弭旌祝輶降止且安

升降欽安 盥悅于下有盤有匱饋酌于上有登有彝
服容柔止進退優止即事實恭神其休止

奠幣容安 育我嘉生神惠是仰載致斯幣庶幾用享
鼓之舞之式繁爾神錫福無疆佑此下民

亞終獻雍安 栗栗壇坫載是豆觴醇烈氤氳普薦芬
芳酌之維宜獻之維時民有報侑靈用安之

送神欣安 奠獻紛紛靈心欣欣超然而返衆御如雲
其施伊何多黍多稌其祥伊何不愆厥叙

大觀祭風師六首

降神欣安 羽旗雲車飄颻自天猗歟南箕欣嘉升煙

牲饌粢盛俎簋鉶籩維神戾止從空冷然

初獻升降欽安 明昭惟馨威儀孔時鏘鏘鳴佩欽薦
牲犧惟恭惟祇無愆無違周旋中禮肅恭委蛇

奠幣容安 吹噓于喁披拂氤氲衆竅咸作潛運化鈞
恩大功豐酬神惟恭嘉贈盈箱于物有容

酌獻雍安 犧尊斯陳清醑盈中芬芬苾苾馨香交通
明靈來思歆我精衷惟千萬祀品物芘芘

亞終獻雍安 清醑洋洋虔恭注茲條鬯敷宣神用歆

之尊壘靜嘉金奏諧熙於皇肆祀休我羣黎

送神欣安 窈冥無窮盼嚮斯融來終嘉薦歸返遙空

惟神之歸欣安導和惟神之澤于彼滂沱

雨師五首

迎神欣安 神之無象亦可思索維雲陰陰維風莫莫
降止壇宇來顧芳馨侑以鼓歌薦此明誠

升降欽安 珮玉璆如黼黻檐如承神不懈訖獲嘉虞
聖皇命祀臣敢弗恭凡爾在位翼翼雍雍

奠幣容安 崇崇壇堦靈既降止有嚴執奠承祀茲始
明靈在天式顧庶察澤潤以時永拂荒札

酌獻亞終獻雍安 寅恭我神惟上之使俾成康年民
侯休祉折俎既登酌酒既盈匪薦是專配以明誠

送神欣安 牲俎告徹嘉樂休成卒事有嚴燕虞高靈
蕃我民人育我稷黍萬有千祀承神之祐

紹興祭風師六首

迎神欣安 夫物罔緼神氣撓之誰歟其司維南之箕

俶哉明庶我祀維時我心孔勞神其下來

初獻升降盥洗欽安 神哉沛矣厥靈載揚揚靈如何

剡剡皇皇我其承之繩繩齊莊往從鬱人爰挾斯芳

奠幣容安 物之流形甚畏瘥癘八風平矣嘉生以遂

絲縷之積有量斯幣惟本之報匪物之貴

酌獻雍安 我求於神無臭無聲神之燕享惟時專精

大磬在列爇燎在庭侑我桂酒娛其以聽

亞終獻 禮有三祀儀物視帝神臨消搖疇敢跛倚重

觴載申百味孔旨神兮樂康答我以祉

送神

曲同迎神

荃其止乎裊裊其容奄橫四海蹇莫之窮
時不驟得禮焉有終荃其行乎余心慙慙

雨師雷神七首

迎神欣安 衆萬之託動之潤之昭格孔時維神之依
洽然後先肆我肯顧是耶非耶紛其來下

初獻盥洗升降欽安 言言祠宮爰考我禮維西有壘
維東有洗爰潔爰滌載薦其醴神在何斯匪遠具邇

奠幣容安 需兮隱兮蹶其陰威相我有終胡寧不知
我幣有陳我邸斯珪豈惟有陳于以奠之

雨師位酌獻雍安 山川出雲裔裔而縷載靈載濛其

德迺溥自古有年胡然莫祖無簡我觴無怠我俎

雷神位酌獻

曲同
雨師

瞻彼南山有虺其出維螫之奮維

癘之息眷焉顧饗在夏之日觴豆匪報皇忍忘德

亞終獻

曲同
初獻

作解之德形聲一兮爰展獻侑酌則三

兮我興有假云胡有私下土是冒庶其遠而

送神

曲同
迎神

陰旄載旋鼓車其鞭問神安歸冥然而天

皇有正命祀事孔蠲其臨其歸億萬斯年

雍熙享先農六首

餘同
祈穀

降神靜安先農播種九穀務滋靈壇致享良耜陳儀
吉日惟亥運屬純熙樂之作矣神其格思

奠玉幣敷安親耕展祀明靈來格九有駿奔百司庇
職獻奠肅肅登降翼翼祈彼豐穰福流萬國

奉俎豐安肅陳韶舞祗薦犧牲乃逆黃道以率躬耕

亞獻正安 祀惟古典食乃民天歆茲潔祀以應祈年
終獻正安 式陳芳薦爰致虔誠神其降鑒永福黎甦
送神靜安 明禋紺壇靈風肅然登歌已闋神馭將旋
道光帝籍禮備公田鑒茲躬稼永錫豐年

明道親享先農十首

迎神靜安 稼政之本民食惟天甫田兆歲后稷其先
靈壇既祀黛耜攸虔乃聖能享億萬斯年

皇帝升降隆安 冕服在御壇壝有儀陟降左右天惟

顯思

奠玉幣嘉安 將躬黛耜先陟靈壇嘉玉量幣樂舉禮
殫神既至止福亦和安千斯積詠萬國多歡

奉俎豐安 將迎景福乃薦嘉牲藉于千畝用此精誠
皇帝初獻禧安 雲罍已實玉爵有舟薦于靈籍佇乃
神休

飲福禧安 神既至享福亦來酬申錫純嘏旨酒維柔
思文后稷貽我來牟子孫千億不荷天休

退文舞進武舞正安 羽葆有奕文武交相周旋合度

福祿無疆

亞獻正安 豆籩雖薦黍稷非馨惠我豐歲歆茲至誠

終獻正安 歆我嘉薦錫我蕃禧多黍多稌如京如坻

送神靜安 獻終豆徹禮備樂成祠容肅肅風馭冥冥

三時務本一墾躬耕人祗胥悅祉福是膺

景祐享先農五首

迎神凝安 在昔神農首茲播殖無有污萊盡為稼穡

乃粒斯民實惟帝力嘉薦令芳佇瞻來格

升降同安 居德之厚厥祀攸陳土膏初脈農事先春

鏗然金奏儼若華紳陟降于阼福祿惟神

奠幣明安 農為政本食乃民天苾芬明祀薦袞良田
陳茲量幣望彼豐年茂介福祉來欽吉蠲

酌獻成安 農祥晨正平秩東作倬彼大田疇乃錢鏹
酒醴盈尊金瓊合樂期茲萬年充于六幕

送神凝安 務穡之本恤祀惟馨神斯至止降福攸寧

崇茲稼政合于禮經俎徹樂闋邈仰迴靈

先蠶六首

迎神明安 生民之朔衣皮而羣惟聖有作被冒以文
禮樂以成貴賤以分欲報之德金石諧均

升降翊安 掩抑笙簫鏗馘金石神來燕娛嘉我休德
奉祀之臣洗心翊翊錫茲福禧以惠四國

奠幣娛安 皇天降物屢化若神聖實先識躬以教民
功被天下為萬世文幣以達志庶幾徹聞

酌獻美安 負哉聖神成功微妙迺衮迺裳以供郊廟
百末旨酒嘉觴自炤靈徠燕饗不嘖以笑

亞終獻惠安 神之徠駕蹒蹒紫壇熙燭夜光會竽瑟
鳴球琅薦旨酒雜蘭芳佑明德賜百祥

送神祥安 神之功兮四海所宗占五帝兮莫與比崇
倏往來兮旌旗容容恭明祀兮萬世無窮

紹興享先農十一首

皇帝入內壇盥洗降安 大事在祀齊潔為先既盥而

升奉以周旋下觀而化無敢不蠲惟神降格鑒厥精虔

迎神靜安 猗與田祖粒食之宗世世仰德青壇載崇
時惟后稷躬稼同功作配並祀以詔無窮

神農后稷位奠幣嘉安 制為量幣厚意是將求之以
類各因其方予以奠之精誠允彰神其享止惠我無
疆

尚書奉俎豐安 柔毛剛鬣或剝或烹為俎孔碩登薦

厥誠

酌獻禧安 蠲滌醴斝巾帨而升挹彼注茲酒醴維清
洋洋在上享于克誠神其孚佑以厚民生

文舞退武舞進正安 羽旄干戚張弛則殊進旅退旅
匪棘匪舒

亞獻正安 顯相祀事濟濟鏘鏘舉斝酌醴神其允臧
終獻正安 穀核維旅酒醴維馨于再于三禮則有成
飲福禧安 幽明位異施報理同克恭明神降福乃豐

我膺受之來燕來崇豈伊專享于彼三農

徹豆歆安 莫重於祭非禮不成籩豆有踐爾殽既馨
神具醉止薦以齊明贊徹孔時釐事斯成

送神靜安 神之來止風駛雲翔神之旋歸有迎有將
歌以送之磬筦鏘鏘何以惠民豐年穰穰

親耕藉田七首

皇帝出大次乾安 勤勞稼穡必躬必親為藉千畝以
教導民帝出乎震時惟上春天顏咫尺望之如雲

親耕 元辰既擇禮備樂成洪縻在手祇飾專精三推
一墀端冕朱紘靡辭染屨以示黎甿

升壇 方壇屹立陸級而登玉色下照臨觀耦耕萬目
咸覩如日之升成規成矩百祿是膺

公卿耕藉 羣公顯相奉事齋莊率時農夫舉耜載揚
播厥百穀以佑我皇多黍多稌丕應農祥

郡官耕藉 畎畹良耜我田既臧土膏其動春日載揚
執事有恪于此中邦農夫之慶棲畝餘糧

降壇 肇新帝藉率我農夫三推終畝祇事咸均陟降
孔時粲然有文受天之祐多稼如雲

歸大次 教民稼穡不令而行進退有度琚瑀鏘鳴言
還煇幄禮則告成帝命率育明德惟馨

紹興祀先農攝事七首

迎神凝安 青陽開動土膏脈起日練吉亥為農祈社
典秩增峻儀物具美幄光煇黃庶幾戾止

初獻升殿同安

盥洗同

率職咸涖禮容睟然澡身端意

陟降靡愆神心嘉虞享茲潔蠲敷錫純佑屢登豐年
奠幣明安 靈旂載臨見光陳贄有嚴篚實式將純意
盼饗既接禮行有次神兮安留歆我禋祀

神農位酌獻成安 耒耜之教帝實開先致養垂利古
今民天嘉薦報本于以祈年誠格和應神娛福延

后稷位酌獻成安 有周應歷實起后稷相時神功率
由稼穡振古稱祀先農並食阜我昌我時萬時億

亞終獻同安 旨具百味酌備三疇貳觴既畢禮洽意

周庶幾嘉享格神之幽相我稽事錫以有秋

送神凝安 熙事成兮始終潔齊籩豆徹兮擗節靡垂

靈有嘉兮降福孔皆飄然逝兮我心孔懷

祀先蠶六首

迎神明安 功被寰宇儻蟲之靈有神司之以生以成

典禮有初祀事講明孔蓋翠旌降集于庭

初獻盥洗升殿翊安

降同

靈脩戾止詔以毛血既盥而

悅尊爵蠲潔金石諧宛登降有節宜顧宜享情文不

越

奠幣娛安 化日初長時當暮春蠶事方興惟后惟嬪
絲纒御冬殘生濟人敢忘報本篚幣是陳

酌獻美安 盛服承祀出自公桑衣不羽皮利及萬方
百味旨酒有飶其香神其歆止洋洋在傍

亞終獻惠安 日吉辰良禮備樂作精誠內孚俎豆交
錯升歌清越侑此三爵黎民不寒幽顯同樂

送神祥安 神之來矣靈風肅然云胡不留歸旒有翩

乃舉舊典歲以告虔降福我邦於萬斯年

景德蜡祭百神三首

降神高安 百物蕃阜四方順成通其八蜡合乃嘉平
旨酒斯醇大庖孔盈萬靈來格威儀以成

奠玉幣酌獻嘉安 肅肅靈壇昭昭上天潔粢豐盛以
享以虔百神咸萃六樂斯縣介茲景福期於百年

送神高安 來顧來享禮成樂備靈馭翩翩雲行雨施
熙寧蜡祭十三首

東西郊降神熙安 天錫康年四方順成乃通蜡祭索
享于明金石四作羽旄翠旌神來燕娛澤被羣生
升降肅安 惟蜡有祭報神之功合聚萬物來享來宗
承詔攝事不忘肅雍靈之格思福祿來崇

奠幣欽安 穰穰豐年繫侯休德帥承天和欽象古則
嘉玉量幣奠容翼翼靈施暨民罔有終極

奉俎承安 禮崇明祀必先成民奉牲以告備膾其均
炮炙芬芬俎豆莘莘錫之純嘏以佑斯人

酌獻懌安 秩秩禮文為壇四方嘉粟旨酒百神迪嘗
敷與萬物既阜既昌伊樂厥福傳世無疆

亞終獻慶安 禮文備矣肅肅無譁金石諧節圭璧光
華染以告豐禮以告嘉錫茲福祉以澤幽遐

送神宣安 靈之來下擴京乘光靈之迴御景龍以驥
鑒我休德降嘏產祥大田多稼以惠無疆

南北方迎神簡安 美若休德民和歲豐稼穡雲施其
積如墉惠我四國先嗇之功祭之百種來享來宗

升降穆安 皇皇靈德經緯萬方承詔攝事陟降以莊
高冠岌岌長佩鏘洋嘉承神貺令聞不忘

奠幣嘉安 於穆明祀莫如報功靈之利澤惠我無窮
齋以滌志幣以達衷撫寧四極永錫登豐

酌獻禋安 英英禮文既備而全嚴嚴四郊屹屹紫壇
百末旨酒其馨若蘭何以畀民既壽而安

亞終獻曼安 林林生民含哺而嬉教之稼穡實神之
為圖報厚德萬祀無期以假以享錫我繁禧

送神成安 嘉薦芳美靈來宴娛存車結雲若風馬馳
既至而喜錫我蕃禧嘉承天貺曼壽無期

大觀蜡祭二首

東郊亞終獻慶安 震乘春陽仁司生殖錫我歲豐襄

我民力誰其尸之宗子先嗇億萬斯年懷神罔極

南郊升降穆安 穆如薰風敷舒文藻氣蒸消除豐子

黍稻神之聽之鐘鼓咸考於萬斯年惟皇之報

紹興以後蜡祭四十二首

東方百神降神熙安園鍾為宮
玄冥凌厲歲聿其周

天地閉藏農且息休古為蜡禮伊耆肇脩爰薦飴香
以迓颺旉

黃鍾為角 惟大明尊實首三辰功赫庶物光被廣輪
歲方索享咸秩羣神靈旉來下尸此明禋

太簇為徵 三時不害四方順成酬功報始以我齊明
函頌土鼓樂此嘉平降祥幅員惠于函生

姑洗為羽 日昱乎晝容光必照盼饗之交惟人所召

有監在下視茲升燎肅若其承雲駢星曜

初獻升降肅安 禮儀告具必儼容莊工歌屢奏聲和

義章崇壇陟降濟濟蹌蹌靈光共仰嘉薦芬芳

大明位奠玉幣欽安 晨曦未融天宇澄穆有虔秉誠

將以幣玉如在左右罔不祇肅神兮安留錫以祉福

帝神農氏位奠幣

曲同大明

農為政本食乃民天神農氏

作民始力田先嗇之配禮報則然有幣將之維以告

虔

后稷氏位奠幣

曲同
大明

播種之功時惟后稷推以配天

莫匪爾極崇侑清祀是為司嗇陳幣奠將永祚王國

奉俎承安 享以精禋馨非稷黍工祝致告孔碩為俎

執事駿奔繩繩具舉神之嘉虞介福是與

大明位酌獻擇安 肇禋備祀教民美報時和歲豐奉

醴以告惟照臨功等於載燾酌獻云初明神所勞

神農位酌獻

曲同
大明

惟酒欣欣惟神冥冥是顧是享來

燕來寧耒耜之利神所肇興萬世永賴無斁其承

后稷位酌獻

曲同大明

釋之蒸之為酒為醴推本所由於

焉治醴周邦開基邵家是啟獻茲嘉觴拜下首稽

亞終獻慶安

申以貳觴百味且旨禮告三終神具醉

止旌容騎沓揚光紛委降福穰穰被大豐美

送神宣安

禮樂既成神保聿歸言歸何所地紀天維

豈惟屢豐嗣歲所祈億萬斯年神來燕娛

西方百神降神熙安園鍾為宮

玄冬肇祀始于伊耆

歲事聿成庸答蕃釐眷言西顧匪神司之歸功爾神

翩其下來

黃鍾為角 魄生自西照望太陽下暨諸神貺施萬方
節適風雨富我困箱恭承嘉祀惟以迪嘗

太簇為徵 神罔小大奠方茲土祭列坊墉禮迨猶虎
有功斯民祀乃其所非稷馨香厥福周溥

姑洗為羽 豐年穰穰美芳職職籩豆方圓其儀孔碩
風馬在御雲車載飭來顧來享維娛休德

初獻升降肅安 盥獻恭莊燎煙芬酷載陟載降禮容

可度欽惟爾神上下肅肅成我稷黍鑒此牲玉

夜明位奠玉幣欽安 穆穆太陰禮嚴姊事璧玉華光

推以哀對十二周天歲乃有終盡我備物莫報元功

神農位奠幣

曲同
夜明

耒耜肇興自神農氏稼穡滋殖為

農者始作配明祀奠以告虔萬世佃漁帝功卓然

后稷位奠安

曲同
夜明

明明周祖惟民之恤播種為教下

民迺粒曾是索饗而匪先公萬物難報阡陌之功

奉俎承安 時和歲登物亡疾瘥實俎間膏報神之福

匪神福之曷成且豐肥腴咸有惟神之功

夜明位酌獻擇安 除壇西郊坎其擊鼓百靈至止結

璘作主秬鬯湛淡玉斝觶膠是謂嘉德神其安留

神農位酌獻

曲同
夜明

蕩蕩鴻明稱秩羣祀配以昔帝式

重農事潔我圭瓚黃流在中靈其鑒茲彤饗豐融

后稷位酌獻

曲同
夜明

歲十二月祀有常典登列司嗇言

反其本酌彼泰尊百末蘭生承神嘉虞繫此德馨

亞終獻慶安

歌磬臚驩管蕭激香飈御奄留申以貳

觴相與震澹告靈其醉庶幾聽之成我熙事

送神宣安 禮備樂成澹然將歸其留消搖象輿已轆
偃蹇欲驤羽毛紛委忽乘杳冥遺此福祉

南方百神迎神簡安 維物之精散乎太空維索之饗
合聚而同迺擊土鼓于歲之終格彼幽矣盼蠻其通
初獻盥洗升降穆安 有悅其新有匝其潔言念清祀
弗簡弗褻誠意既交品物斯列是用告虔靡神不說
奠幣吉安 百室機杼衣褐具宜民以卒歲神實惠之

言舉祀典答神之釐有篚斯陳振古如茲

神農位酌獻穆安 肇降生民有不粒食維時神農迺
為先嗇爾耒爾耜云誰之因酌以污尊我思古人

后稷位酌獻穆安 維后之功配天其大祀而稷之萬
世如在黃冠野服駿奔皇皇自古有年神其降康

亞終獻曼安 豐年孔多百禮以洽匪極神歡何以昭
答載酌之酒用申其勤神具醉止與物交欣

送神成安 卒爵樂闋禮儀告備神保聿歸敢以辭致

順成之方其蜡乃通自今以始八方攸同

北方百神迎神簡安 蕩蕩闡決氣清沈寥彷彿象輿

麗于穹霄蹇其來下肅然風飄神乎安留於焉消搖
初獻盥洗升降穆安 齊誠揭虔敬恭祀事維儼之容
維潔之器雍雍樂成肅肅禮備神其燕娛錫祉庶類

奠幣吉安

配位同

神宅于幽眈眈沈沈至和塞明考我

德音神聽靜嘉儼乎若臨幣以薦誠敢有弗欽

神農氏位酌獻禋安 先嗇之功神實稱首以耜以耒

倣載南畝列籍皇墳億世是守何以為報爰潔茲酒
后稷氏位酌獻禋安 煌煌后稷實配于天司穡作稼
民以有年匪神之私歲以醴告酌彼泰尊于德之報
亞終獻曼安 蘭生百味申以貳觴神具醉止爛其容
光遺我豐年萬億及秭俾民驩康以洽百禮

送神成安 靈之來兮蚪龍杳杳下土光景憑陵閭闔
靈之旋兮羽衛委蛇偃蹇高驥遺此蕃釐

景祐祭文宣王廟六首

迎神凝安 大哉至聖文教之宗紀綱王化丕變民風
常祀有秩備物有容神其格思是仰是崇

初獻升降同安 右文興化憲古師今明祀有典吉日
惟丁豐犧在俎雅奏來庭周旋陟降福祉是膺

奠幣明安 一王垂法千古作程有儀可仰無德而名
齊以滌志幣以達誠禮容合度黍稷非馨

酌獻成安 自天生聖垂範百王恪恭明祀陟降上庠
酌彼醇旨薦此令芳三獻成禮率由舊章

飲福綏安 犧象在前豆籩在列以享以薦既芬既潔
禮成樂備人和神悅祭則受福率遵無越

充國公配位酌獻成安

拓宗朝增
此一曲

無疆之祀配侑可

宗事舉以類與享其從嘉粟旨酒登薦惟恭降此遐
福令儀肅雍

送神凝安 肅肅庠序祀事惟明大哉宣父將聖多能
歆馨盼饗迴馭凌兢祭容斯畢百福是膺

大觀三年釋奠六首

迎神凝安 仰之彌高鑽之彌堅於昭斯文被于萬年
我我膠庠神其來止思報無窮敢忘于始

升降同安 生民以來道莫與京溫良恭儉惟神惟明
我潔尊罍陳茲芹藻言升言旋式崇斯教

奠幣明安 於論鼓鐘于茲西雍粢盛肥碩有顯其容
其容洋洋咸瞻像設幣以達誠歆我明潔

酌獻成安 道德淵源斯文之宗功名糠粃素王之風
碩兮斯牲芬兮斯酒綏我無疆與天為久

配位酌獻成安 儼然冠纓崇然朝庭百王承祀涓辰
惟丁于牲于醑其從予享與聖為徒其德不爽

送神凝安 肅莊紳綏吉蠲牲犧於皇明祀薦登惟時
神之來兮盼饗之隨神之去兮休嘉之貽

大晟府擬撰釋奠十四首

迎神凝安黃鍾為宮 大哉宣聖道德尊崇維持王化

斯民是宗典祀有常精純並隆神其來格於昭盛容
大呂為角 生而知之有教無私成均之祀威儀孔時

維茲初丁潔我盛染永適其道萬世之師

大簇為徵 巍巍堂堂其道如天清明之象應物而然
時維上丁備物薦誠維新禮典樂諧中聲

應鍾為羽 聖王生知闡迺儒規詩書文教萬世昭垂
良日惟丁靈承不爽揭此精虔神其來享

初獻盥洗同安 右文興化憲古師今明祀有典吉日
惟丁豐犧在俎雅奏在庭周旋陟降福祉是膺

升殿同安 誕興斯文經天緯地功加于民實千萬世

笙鏞和鳴，粢盛豐備。肅肅降登，歆茲秩祀。

奠幣明安，自生民來。誰底其盛，惟王神明。度越前聖，粢幣具成。禮容斯稱，黍稷非馨。惟神之聽。

奉俎豐安，道同乎天。人倫之至，有饗無窮。其興萬世，既潔斯牲。粢明醑旨，不懈以忱。神之來暨。

文宣王位酌獻成安，大哉聖王。實天生德，作樂以崇。時祀無斁，清酏惟馨。嘉牲孔碩，薦羞神明。庶幾昭格，究國公位。酌獻成安，庶幾屢空。淵源深矣，亞聖宣猷。

百世宜祀吉蠲斯辰昭陳尊簋旨酒欣欣神其來止
鄒國公位酌獻成安道之由興於皇宣聖惟公之傳
人知趨正與享在堂情文實稱萬年承休假哉天命
亞終獻用文安百王宗師生民物軌瞻之洋洋神其
寧止酌彼金罍惟清且旨登獻惟三於噫成禮

徹豆娛安犧象在前豆籩在列以饗以薦既芬既潔
禮成樂備人和神悅祭則受福率尊無越

送神凝安有嚴學宮四方來宗恪恭祀事威儀雍雍

歆茲惟馨飀馭旋復明禋斯畢咸膺百福

景祐釋奠武成王六首

迎神凝安 維師尚父賜履分封靈神峻密祀事寅恭
蕭薌祗薦飀馭排空如幾如式福祿來崇

大尉升降同安 上公攝事袞服斯皇禮容濟濟佩響
鏘鏘靈旂惚恍嘉薦令芳神具醉止降福穰穰

奠幣明安 四嶽之裔涼彼武王發揚蹈厲周室用昌
追封廟食簡冊增芳升幣以奠馨莞鏘鏘

酌獻成安 獵渭之陽理冥嘉應非龍非虎聿求元聖
平易近民五月報政祀典之崇於斯為盛

飲福綏安 神機經武隆周之寓表海分封邁燕超魯
眈眈廟貌俎豆有序薦福邦家維師尚父

送神迎安 聖朝稽古崇茲武經禮交樂舉于神之庭
嘉粟旨酒既饗芳馨永嚴列象劔舄簪纓

熙寧祀武成王一首

初獻升降同安 武德泱泱日靖四方百王所祀休有

烈光命官攝事佩玉鏘鏘思皇多祐以惠無疆

大觀祀武成王一首

酌獻成安 涼彼周王君臣相遇終謀其成諸侯來許
洋洋神靈尊載酒醑新聲為侑笙簫備舉

紹興釋武成王七首

迎神凝安姑洗為宮 於赫烈武光昭古今載嚴祀事

敕備惟欽既潔其牲既諧其音神之格思來顧來歆
初獻升殿同安 肅肅廟中有嚴階墀匪棘匪徐進退

可則冕服是儀環珮有節神之鑒觀率履不越

奠幣明安 祀率舊典禮崇駿功齊明衷正盼饗豐融
量幣肅備周旋鞠躬神其昭受幽贊無窮

正位酌獻成安 赫赫尚父時維鷹揚神潛韜略襟抱
帝王談笑致主竹帛流芳國有嚴祀載稽典常

留侯位酌獻 眷彼留侯竒籌贊漢依乘風雲勒成功
旦克配明裡儀刑有煥英氣如生來格來衍

亞終獻正安 道助文德言為世師功名不泯祀事無

遺旨酒惟馨具醉在茲有嘉累獻神其燕娛

送神 日惟上戊神顧精純禮備三獻樂成七均奄留
洋洋流福無垠言還恍惚空想如存

紹興祀祚德廟八首

迎神凝安姑洗為宮 匿孤立後惟義惟忠昔者神考

追錄乃功祀典載加進爵錫公神兮降格尚鑒褒崇
初獻升降同安 廟宇更新輪奐豐敞神靈如在英姿
颯爽執事進趨降升俯仰威儀翼翼虔祈歆饗

奠幣明安 牲薦碩大幣致精純聿升祀事茲用兼陳
箱篚既實奠獻惟寅饗我至意福祿來成

疆濟公位酌獻成安 以身託孤實惟死友撫嫗長之

若父若母潛授于韓克興厥後崇廟以獻德侈報厚
英略公位酌獻成安 立孤固難死亦匪易義輕一身

開先趙嗣肅穆廟貌烈有餘氣式旋嘉薦昭哉祀事
啟佑公位酌獻成安 於皇時宋永祚有基始繫覆護
扶而立之敢忘昭答牲分酒醜靈其燕饗益相本支

亞終獻用正安 呦呦靈宇神安且翔三指鼎峙中薦
嘉觴凜若義氣千載彌光猗其祐之錫羨無疆

送神凝安 禮樂云備畢觴爾神翊翊音送轆輿若聞
駕言歸兮靈存結雲祚我千億介福來臻

司中司命五首

迎神欣安 冠峩峩兮服章蕤蕤靈來下兮進止委蛇
我涓我壇我潔我俎降輿卻旌於茲享御

升降欽安 紳綏舒舒佩環鏗鏗陟降上下壇燎光明

有盥于罍有悅于巾不吳不敖庶以安神

奠幣容安 我誠既潔我豆既豐神來降期有儼其容
薦此嘉幣肅肅雍雍何以侑之於樂鼓鍾

酌獻雍安 酌茲旨酒既盈且芬式用來歆衍衍熏熏
何以寧神薦有嘉薦何以錫民曰惟豐年

送神欣安 雲兮飄飄風兮稜稜飈馭反空杲日來昇
歸旆揚揚衆樂鏘鏘我神式懽惠我嘉祥

五龍六首

迎神禧安 神之智兮躍漢潛幽欲參擾兮無董與劉
陳金石兮佐侑宰羞庶燕享兮澤應民求

升降雅安 靈之至兮逸駕騰驤噓雲吸氣承祀日光
展詩鳴律肅莊琳琅何以膺神貺惠無疆

奠幣文安 維靈德兮變化不常沛天澤兮周流八荒
奠嘉幣兮肅雍不忘永佑民兮錫以豐穰

酌獻愷安 練吉日兮進神之堂牲既陳兮粢盛既香
奠桂酒兮容與嘉觴靈安留兮錫我福祥

亞終獻嘉安 明明天子禮文咸秩矧神之功橫被九
域雲施稱民物產滋殖嘉承惠和罔有終極

送神登安 靈之來下以雨先驅靈之旋馭五雲結車
操環應夏發匣端虞真人在御來獻珍符

宋史卷一百三十七

謹案卷一百三十六第一頁前六行祀嶽鎮海瀆
刊本瀆訛濱今改





總校官庶吉士臣張能照

校對官編修臣閔惇大

謄錄監生臣嚴儀

謄錄監生臣仲耀崧

財團法人
佛陀教育基金會
釋淨空
敬

